

ADVIS  
DES CAVSES  
ET RAISONS DE LA  
PRINSE DES ARMES EN  
LA VILLE DE LYON,  
pour la conseruation  
de leur liberté.



A LYON.

---

M. D. XCIII.

232742 232

AT THE NEWBERRY

LIBRARY

Case

F

39

325

1593a

THE NEWBERRY  
LIBRARY

M O T A A

INDEX R I M



A D V I S  
**D E S C A V S E S E T R A I -**  
**S O N S D E L A P R I N S E D E S**  
 A R M E S D E L A V I L L E D E  
 Lyon, pour la conseruation  
 de leur Liberté.



**P** A R M Y tant d'afflictions, dont ceste desolee France a esté si cruellement trauaillee depuis ces derniers troubles, chacun iugeoit que ceste Prouince Lyonnoise seroit l'vne de celles qui moins se resentiroit de ces miseres & guerres ciuiles, tât pour estre assez vnies, que pour auoir heureusement rompu & esloigné ses ennemis: comme veritablement le iugement n'eust point esté faux, si par ceux qui en auoyent prins l'administration & gouuernement, elle eust esté conseruee & deffenduë de l'oppression, de la crainte, & ambition, non de ses ennemis, mais des siens propres, qui l'ont affligee de toutes les cruantez, exactions, violences, pilleries & desordres, dont on pouuoit s'aduiser pour la ruine entiere d'un Estat, ceux qui moins affectiõnez à la France, tournoyent leurs actions, non à la chose publique, conseruation de la Religion & estat Royal ensemble: mais à leur par-



ticulier, & iugeoyent par discours humains, le  
 bris de ce grand Nauire, & que chasque Gou-  
 uerneur se tiendroir à sa piece (tant peut l'am-  
 bition & l'infidelité du meschant. ) Et pour ne  
 passer plus auant chascune prouince de ce Ro-  
 yaume sçait à son regret, ce qui a esté pratiqué  
 chez elle, par qui, cōment, sous quels tiltres &  
 esperāce, & avec quels moyens. Dieu qui est  
 iuste vëgeur des vsurpateurs du bien d'autrui  
 a garanty iusques icy par la main de son serui-  
 teur Monsieur le Duc de Mayenne, ceste pau-  
 ure Frāce, de telle vsurpation & seruitude tyran-  
 nique, qui merite cest honneur, de l'auoir fidel-  
 lement conseruee entiere à ses heritiers legiti-  
 mes contre les flots d'une mer d'ennemis.  
 N'ayant voulu souffrir ceste honte & marque  
 d'indignité en sa maison, de fauoriser sous la  
 Lieutenance generale de cest Estat & Coron-  
 ne de Frāce, ces particulieres tyrānies & vsur-  
 pations estrangeres, telle qui se bastissoit par  
 le Duc de Nemours: qui sous le pretexte de la  
 religion & deffence de ce pays, a ietté si auāt la  
 veuë sur noz biens & liberté, qu'il s'est osé pro-  
 mettre pendant ce trouble de ce miserable tēps  
 de nous enchaîner en vne si miserable seruitu-  
 de, & rendre ce gouuernement hereditaire en  
 sa maison. Ce sont ses veux, ses desseins, ses en-  
 treprinſes, qu'un chacun a peu preuoir ou-  
 uer



uertement, se bastir & conduire pour nous eschantillonner de ce grand corps de la France. Mais le respect de la cause nous tenoit tellement assoppis & enyurez qu'elle nous faisoit plustost esmerueiller ses mauuais conseils, voir les pallier, comme chose incroyable, qu'il voulut partir de ceste Vnion promise & iurée, que d'y pouruoir & veiller ses actions iusques à ce que les exactions, volleries, forcemens de filles & femmes, les desordres que ses troupes commettoient impunement sur le plat pays, la crainte d'une seruitude plus grãde l'impatience & la fureur d'un plus grand mal prochain nous ont fait reueiller de cest assoppissemēt desprit, pour se saisir de la personne de celuy qui nous cauſoit toutes ses violence, & qui ja nous menaçoit, comme les esclaués, de ses Citadelles, menottes & forteresses. Je ne discouriray point icy particulièrement, quelle estroite obligation ses predecesseurs ont a la France, qui les a tousiours honorez. Combien qu'il s'en soit trouué de sa maison moins fidelles à ceste couronne, pour n'interessier l'honneur des Princes, à qui ils attouchent d'alliance, & que ceste province ayme encor & honore. Je ne discourray point (dis-je) de son aduancemēt à ce gouuernement, apres sa prison de Blois, combien il arriua pauvre & desnüé de moyens, & souffre-



teux: ce que tout ce corps de prouince fit pour  
 l'appeller de deça, le receuoir honorablement,  
 l'aggrandir, cacher ses necefsitez, l'enrichir de  
 trente mil escus pour son retour en France. Et  
 neantmoins déslors apres s'estre remply des  
 vents & esperances de ceste demonstration  
 d'amour cordialle, il tenta familierement au-  
 cun de ceux qu'il iugeoit pour lors de ses plus  
 priuez & fidelles amis, qu'il y auoit moyen sous  
 le defordre de ce temps, qu'il estimoit deuoir  
 durer à iamais, de se rendre maistre absolu du  
 gouuernement, & d'y faire sa maison. Laissons  
 ces discours & infinis autres choses passees qui  
 ne feront que nous retenir estonnez & surpris  
 de ses commencemens, & venons au particu-  
 lier du project qu'on auoit fait pour nous rui-  
 ner, afin que tous ces ingenieux, vsurpateurs,  
 & tyrans entendent que ceste prouince perira  
 plustost de fond en comble, que de souffrir  
 que ceux qu'elle nourrit soyent traistres à  
 leur propre país, flechissent souz le com-  
 mandement estranger, & qu'elle soit la premie-  
 re qui se soit desmembree de cest estat Royal  
 & couronne de France ( hors de laquelle elle  
 sçait quels sont les traitement de ses voisins,  
 souz qu'elle mœurs, quelle loix & conditions  
 ils viuent auourd'huy biẽ esloignez de la dou-  
 ceur & liberté de ceste belle couronne. ) De là  
 cha

7  
chacun entendra qu'elle iuste douleur nous a  
poussé à ce qui s'est passé ces iours derniers:  
(chose qui est aduenüe si forcement) & apres  
tant de lōguez & souffrance que comme il e-  
stoit endurcy à la continuation des desseins de  
son vsurpation: il sembloit paroistre que frap-  
pez d'une letargie nous fussions sans sentimēt,  
mesprisans les aduertissemēs de noz voisins &  
amis, qui ressembloit aussi vaine que si on se  
fust adressé à des statues. De sorte que par mo-  
querie on disoit apres l'vsurpation tyrannique  
& preueüe de tous ceux de la ville de Mont-  
brison, ville capitale de Forests & construction  
nouuelle de sa Citadelle, que les oysons de Fo-  
rests estoient bridez. Ainsi le gaussait-on de la  
prise des gens de bien. Nostre maladie estoit  
veritablement cruelle, elle nous auoit osté le  
sentiment avec la santé, la deffence de ceste  
cause, l'amour de nostre Religion, la crainte  
d'aggrandir noz ennemys, & d'offencer Mon-  
sieur de Mayenne, & le siege de la raison enue-  
loppé de toutes ses considerations qui deuoyēt  
iuger de tous ces amis qu'on receuoit ordinai-  
remēt, de la coniuration faicte contre la liber-  
té du pays souffroit si estrangement qu'elle in-  
terpretoit toutes choses à bien, sans s'amuser  
aux auertissemens que le temps nous a fait voir  
pour tres-veritable, vaincus neantmoins du  
mal



mal, pressez de la violence, forteresses & garnisons, desnuez de moyens; & poursuyuis iusques à vne lassitude & foiblesse extreme de ce gouvernement. Apprenons donc comme la nécessité propre a contraint les choses à ce qu'on n'eust iamais pensé deuoir arriuer. Le Duc de Nemours tout pompeux de s'estre trouué des principaux au siege de Paris (encore que la principale occasion en soit deuë à ceste noblesse courageuse Francoyse qui l'assistoit, à l'ardeur infinie des Parisiëns de mourir plüstoit de faim, de soif, de peste, & de la violence du fer, que de receuoir aucune composition au preiudice de la religion & de son Estat) se ressouenant des projets de son vsurpation pretendüe, reprint ses esprits & desseins: & par menées secretes, fit practiquer son retour en ce gouuernemēt, sont des considerations si legeres, qu'on iugera sans affection, que c'estoit des surprises & pieges dressez à vn pauvre peuple par des personnes qui visoient plus au cōtenteemēt particulier de ce Duc, & de sa maison, & de leurs pretentiōs, au maniement libre de la chose publique, qu'à fauoriser & soulager ce gouuernement lequel, Dieu mercy, il trouua en repos, sans guerre, ou ennemis, qui peussent troubler l'Estat paisible, auquel se maintenoit ce gouuernement, hors de tant d'exactions & ruynes qui depuis nous

sont



font aduenues. Tout ce qui seruoit le plus à la couleur de ce retour si desiré d'aucuns qu'on cognoit assez depuis sa venue s'estre iniustement enrichis & empourprez souz la souffrance de ce Prince, estoit la querelle des Sieurs de Cheurieres & d'Vrfé, laquelle ledit sieur de Cheurieres, pour ne troubler le repos de son pays qu'il luy auoit heureusement acquis pendant qu'il auoit esté en charge, s'estoit reseruee de demesler au retour dudit Duc, fut par iustification en plain conseil fut par duel à la veüe de tous. Ces pensionnaires & solliciturs, publioient par tout que ceste querelle s'en alloit ruyner le pays, & donner entrée à l'ennemy, encores que le temps & la sçeance que faisoit ledit Sieur de Cheurieres en sa maison fist assez iuger du contraire. Disoit on que ce retour estoit plus qu'il ne necessaire, non pas comme l'effect a depuis fait cognoistre, pour ouyr ces deux principaux sieurs & arcz-boutans de la prouince, leur rendre droit amiablement, les accorder comme il pouuoit. Mais pour les enaigrir, nourrir & entretenir en ceste querelle, & empescher leur renom, laquelle (luy disoit ces mercenaires) empeschoit aucunement la naissance & accroissement de ses desseins en ce gouuernement. De tous deux en fin s'est-il defait, l'un pour le laisser en sa maison reclus sans charge & autorité, & l'autre apres l'auoir



publiquement blalmé l'a despouillé honteusement de sa charge : où sont les sages amis & conseils de Monsieur de Lyon, cest esprit diuin, ce Primat des Gaules, ce second saint Denis de la France qu'il n'ait soubſconnez, blasmez, & reiettez, comme ennemis de son usurpation deſſeignée. Ainſi practiquent les tyrans, la vie & l'honneur de ces grans-la, de ces restes de pauots, de ceux qui principaux Seigneurs & nez en la prouince luy ont de l'affection, faueur, & obligation, à la maintenir en ſes priuileges & libertez, pour l'intereſt commun qu'ils y ont tous. De là noit-on pas la plainte qu'aucuns flateurs ſtipendies firent de laſſemblée, & traité fait a la Breſle, par les trois ordres de ce gouuernement, pour la conſeruation de ceſte prouince? Comme fait au preiudice de l'autorité de ce Duc, de ſon frere, & de ſa maiſon, qu'on vouloit figurer comme ſouuerains de ce pais? Par les ruës & cabarets on n'entendoit parler que ces mercenaires perroquets, de l'auancement & faueurs de ceſte maiſon, de eſperances & promeſſes qu'un chacū deuoit auoir, des conqueſtes, faits d'armes prinſes de villes & prouinces, dont ce grand aſſiegeur Demetrius deuoit illuſtrer & eſtendre ſon gouuernement, lesquelles toutes ſe conuertirent en bien peu de temps à diuerſes & extremes leuees de deniers, qui



qui ne furent oncques faictes souz la plus grād<sup>e</sup> nécessité de noz Roys, quelque guerre ciuile ou estrangere, qu'ils ayent heu. Dequoy ont serui ces deniers à la prouince? Certes de trop plus de mal qu'on n'eust iamais iugé: car aussi tost ils furent recogneuz seruir a' lacquisitiō des seruiteurs a ce Prince, qui se rēdirent aussi tost noz ennemis secrets, appeller & entretenir estrangers, practiquer les citoyens de la ville, sous promesse de pension & Estat: capparer les Capitaines du Gouuernement, les lier à ses commandemens, par dons & sermens faits en secret, de ne recognoistre iamais autre que luy: esleuer les petits, les incognus, les preuostables à la ruine des grands, n'employer la Noblesse du pays, mais au contraire de fauoriser de tous points d'honneurs, pour esleuer des estrangers, sang-sues du pays. Ce sont les premiers deportemens dont il a vsé à son aduenement, qui ont esté eutresuyuis de menees & façons de faire, d'allees & venues, pour par les, secrettas ambassades & intelligences avec les ennemis, & ses semblables, de tous costez indifferement de l'une & l'autre religion, tant dedans que dehors le Royaume, conduites au plus fort de la nuit, & recogneues le iour par les sages & bons citoyens. Que ne se resouenant plus du seruice de la cause generale: il ne tra-



uailloit aussi plus qu'à se faire voye à la souue-  
 raineté & vsurpation de ce gouuernemēt, pour  
 laquelle plus seueremēt auoir, il desiroit d'en-  
 chainer ce grand Lyon pour auoir ce qui est  
 requis à l'accomplissement de son imaginaire  
 grandeur. Quels en ont esté les moyens trop  
 plus que melchans & detestables pour nous,  
 miserables, ni sous l'aage d'un Prince si enne-  
 my de nostre liberté, apres auoir recongneu  
 l'humeur bonne & paisible des subiets de ce  
 gouuernement, & l'amour qu'ils portoyēt à ce  
 party? Il estima que ceste mesme bōté & amour  
 de ceste cause couurit ses proiets. A ces fins il  
 se saisit du pays de Dombes, fortifia le chasteau  
 de Tossy, & le vouloit nouuellement faire de  
 Treuol, & de Belle-ville. Acheta de noz deniers  
 au peril de sa foy, & du traitté fait avec le Co-  
 lonnel Alphonse, Gouverneur du Dauphiné,  
 la ville & chasteau de Vienne. Surprint la ville  
 de Montbrison, & y bastit aussi tost vne Cita-  
 delle, s'empara des Chasteaux des particuliers  
 Seigneurs de ce gouuernement, comme de  
 saint Priest, & de Virieu possédez par des sim-  
 ples ames du pays: se mist à mugueter & ten-  
 ter la fidelité des gardes des noz portes & ba-  
 stions, iusqu'à visiter toutes sortes de promon-  
 toires, lieux hauts & eminents de nostre ville,  
 qui pouuoient nous cōmander. Voire de louër  
 en pu



en public les Gouverneurs des Prouinces particulieres de ce Royaume qui auroit sceu par la succession tyrannique du temps bastir des Citadelles dās les villes de leur gouuernement. C'est de là qu'il a cherché de muer le commerce public, pour affoiblir les moyens de la ville de Lyon, de ce gouuernement, qu'il scauoit, ne pouuoir longuement subsister, iceluy pour plus aisémēt bastir vne Citadelle, estant plus affoibles. Pour à quoy plus aisément arriuer, il a de tous costez moyenne, & poursuuy le sieur de S. Iulien, Seigneur de ce party, qu'il luy remit Quirieu, & en recompense il luy donneroit quarante mille Escus. Quelles entreprinſes a-il fait contre le sieur de Varennes aussi Gentil-homme & Seigneur de ceste cause, pour auoir en sa puissance la ville de Mascon, & toutes les villes & lieux aboutissans sur les riuieres du Rosne, & de la Saune, pour donner autant de nourriture & d'alimēt, par ses deux fleuues à la ville de Lyon, qu'elle luy demeureroit subiecte, obeissante & serue? Les sieurs de Varenne & S. Iulien ne sont-il pas tousiours demeurez très-fidelles à ce party, ouy veritablement: les effects l'on fait iuger ainsi. Ce prince les a aymez, mais il eust encor plus aymé Mascon, & Quirieu, qu'eux ni leur fidelité, laquelle luy estoit mal agreable.

Passons oultre & ressouuenons nous comme  
 ce Prince, pour ordinaire d'aller la nuit, pour  
 pratiquer l'un, guetter l'autre, sortant encores  
 dehors, & en pleine nuit, pour par ses allées &  
 venues, surprendre vne porte. D'où vient qu'il  
 ait esté desplaisant que noz Suysses, de la fide-  
 lité, desquels il s'est souuent mocqué, les appel-  
 lans des fors, & grossiers, ne luy ayent rendu le  
 serment qu'ils ont faict au corps de la ville?  
 C'estoit pourquoy il persuadoit tant par ses  
 esclaves Conseillers, qu'on eust à les renvoyer  
 en leurs pays, pour prendre en leur lieu & pla-  
 ce des Lansquenets, qui seroyent entretenus  
 des deniers d'Espagne, sans qu'il nous coustast  
 rien de noz bourses. Allez conseillez, allez faire  
 voz pratiques ailleurs, allez : allez, pratiquer  
 des Escheuins à sa poste, sous la couleur de di-  
 uerses entreprinſes, nous enleuer noz pieces &  
 canons, donner de munitions, comme vous  
 auez faict : ce sont les pratiques, & desseins de  
 vostre vsurpation, & de laquelle vous mesmes  
 n'auez pas peu (perroquets Conseillers) vous  
 taire. N'estoit-il pas temps de desiller les yeux  
 nous releuer de ceste longue letargie & auillif-  
 sement de courage, reprendre ceste premiere  
 amour de la cōseruation de nostre Religion, a-  
 uec la liberté de nostre pays, cōmū à tous tous  
 pour mourir cent mille fois plustost que d'estre  
 si mes



meschants, & traistres, que de ne transmettre à nos successeurs la liberté mesme que nos peres nous auroyent acquise par leur sang & valeur? Que pouuions-nous esperer de ce Prince qui ne vouloit iamais ouyr parler de noz miseres & calamitez, & ausquelles il pouuoit remedier aisement? Quelles responses indignes & menaces iniurieuses a-il fait aux Syndiques du pays, soy plaignans des brigandages, rauissemens de femmes & filles, bourrellemens, & d'un million de vols & larrecins publics faits en la prouince? Leur a il pas promis iustice en public, & aussitost a l'oreille leur a-il pas vsé de ces menaces & blasphemmes qui luy sont ordinaires, clos & fermé la bouche de ces pauures syndics & procureurs du pays. Ou est l'ordre? ou est la police ou sont ceux qu'il fait pendre ou rouier? La vollerie est ouuerte, la plainte est deffenduë, la iustice est forcee, les officiers emmenottez, les pauures supplians chassez de la Cour de cest vsurpateur. Bon Dieu! a quoy estions nous reduits? Nos pechez surmontoyent-ils vos misericordes? Quelle bouëtte de maux & de miseres auoit respandu sur nos testes ceste Pandore qui neust iamais pitié de l'affligé? qui ne parla iamais que d'enuenimer le peuple contre la noblesse, les des-vnir d'ensemble, les mutiner par vn entretien ordinaire de soldats

sur pied, faignant des entreprises nouvelles ou de secourir Monsieur de Sauoye, pour nous surprendre au descouuert, faire le Tamerland & le Rodomont parmi ceux qui n'ont eu de quoy s'opposer à ses braueries? Aggasser ses voisins sans subiet, afin de perpetuer la guerre dans le pays: secourir ceux de ce pays, ou pour les surprendre, ou en tirer des recompenses de deniers si immenses qu'ils en seroyent appau-  
 uris roller icy, brigander la, bailler des passe-ports, & sous la faueur & seuretté publique d'i-  
 ceux faire esgorger les personnes, les voller, les piller & arrañconer? Mais venõs à quelle fin il a si souuent poussé ses desseins iusqu'aux extré-  
 mitez de ce gouuernement, & nous verrõt que ç'a esté pour s'acquerir & soustraire les sieurs des prouinces, d'ont il n'est Gouverneur: leur enleuer frauduleusement les places & fortref-  
 se de leurs gouuernemēt, troublāt par menees secretes l'Estat mesmes de son propre frere, son aîné, son superieur, & celuy qu'il faut qu'il recognoisse maulgré luy pour Lieutenant ge-  
 neral de cest Estat Royal. C'a esté la legereté ordinaire de ses conquestes & desseins. Mais c'estoit incontinent pour aussi tost reuenir voir si ce grand Lyon estoit enchainé, si ses pieges & filets luy estoient rendus: ses Citadelles & Forteresses basties, & si ses pensionnaires con-  
 tinuoient



tinuoient en son amitié, ou plustost perfidie à leur pays, voir quelles choses luy estoient encores nécessaires au bastiment de ceste souveraineté imaginaire. Et pour mieux couvrir la plainte que nous luy auons faicte de noz soubçons, ne s'est-il pas aydé de deuotions publiques & extraordinaires (souz le manteau desquelles ie n'ose dire pour n'irriter le ciel) ce qui s'est fait & commis? Combien estroittement nous a-il asseurez avec serments estranges qu'il ne pensa iamais à nous donner occasion de se plaindre de ses actions, que c'estoyent les ennemis de ce party qui faisoient courir ces faux bruits, pour les mettre mal ensemble, & calōnier ses belles entreprinſes) desseins & artifices que Dieu a descouverts, & comme desagreables, impies, & mal-heureux, les a reiettez: & surprins l'autheur d'iceux en son malefice? Ou est le bien qui luy a esté demandé par les siens qu'il n'ait confisqué & donné, sans cognoissance de cause, forme ou figurée de iustice, cōme s'il eust esté le vray maistre ou propriétaire de nos biens & fortunes? Il me souuiēt (mais c'est avec la larme a l'œil) des mal-heureux dons qu'il faisoit du bien de ceux qui mouroyent sans enfans, encores qu'il eussent d'autres parens proches, comme si nous tous eussions este de Main-morte. N'a-on pas sceu dans Lyon plu-

fleurs de ses Capitaines & soldats s'équerir particulieremēt quels malades il y auoit en leurs rues, & aussi soudainement qu'il auoit asseuré de quelque malade entroit en sa maison, se faisoit d'icelle, la saccageoit, ou du moins contraignoit les parens des malades ou decedez de cōposer avec eux, cruauté plus que Turquesque & Barbare propre a ses Estats qu'il tient esclaués & Main-mortables. Nous sommes francs & libres, qui sommes le fleau & l'amortissement de telles seruitudes qui n'ont rien du vray Chrestien & genereux François. Auons nous peu patir tant de maux, tant de redoublement de tailles accompagnez de nouuelles forme d'emprunts & daces, tant de violēces & rauages? ouy certes nous l'auons souffert & l'auons excusé le plus souuēt en ses forfaits. Il y a de plus q̄ nous auōs enduré qu'il ait fait forger Monnoye d'un alloy tres foible, qu'il ait fait receuoir & aussi tost deffendre, qu'il ait fait des officiers, qu'il se soit opposé aux Magistrats, qu'il ait fait emprisonner les gens de bien, constituez en hōneur & charge publique, qu'il aye ballotté iusqu'a noz vies & fortunes, pour ne troubler la seureté & auancement de ce party. Tout ainsi qu'on souffre le trop de pluye la sterilité de la terre & autres mal-heurs qui nous auient de la nature ou de la main de Dieu

pour



pour noz pechez. Mais quant on a veu que ce Prince haïssoit du tout le pays, reiettoit la treue accordée en plains Estats, lesquels il auoit si auant mesprizez, qu'il n'auoit daigné y comparoir, y estant humblement & avec priere conuic par eux ne recognoissoit le commandement d'aucun qu'il estimast son superieur, qu'il s'esgalloit mesmes au general de cest Estat Royal & Couronne de France de laquelle il ne craignoit d'efflorer le liz, qu'il leuoit nouvelles compagnies r'allioit à soy les licētiez par la trefue, & en plein iour nous les faisoit voir opposée a noz testes. Que pouuions nous preiuger que la souueraineté ou vsurpatiō Prochaine de laquelle nous auions esté si souuent auertis & menassez tant par ceux de la prouince que noz voisins & des estrangers, mesmes de ce Royaume? que si Dieu nous eust si peu aimez que de nous laisser asseruir a ce Prince, en quelle fondriere de miseres tombiōs nous? lursurpateur & tyran n'ayme rien tant que sa grandeur, il hait le peuple, franc la liberté des villes, l'assemblée des Estats & ordre de la Prouince. Soupçonne la grandeur & richesse des subiets, quelque douceur qu'il monstre, il couue tousiours quelque venin en son cœur: forme & interprete des loix selon ses passions, enrichissant le fauory de la despoüille de l'innocent accusé.

N'ayez crainte que les pechez demeurent impunis sous tels vsurpateurs, & tyrans: i'entens les fautes des riches, car ceux qui auront forfait, tant legierement soit-il, seront songneusement recherchez. Non tant pour la consideration de la meschanceté pretenduë commise; ains à fin de raur la substâce de l'accusé, ou pour asseurer ses soupçōs & effrois d'une ame & conscience bourrellee de ses pechez, ou pour assouuir la cupidité des ministres de son vsurpation, les fautes à telles personnes n'enuieillissent iamais, & telles qu'elles sont supposees, sont tousiours soupçonnees, commises contre l'Estat, sans qu'il soit loisible de se iustifier. Tels sont les traicts & manemens de l'vsurpation estrangere, tels ses portemens où il n'y a droict qui ne soit iniuste aux vaincus. Mais quand nous eussions esté à luy, & qu'il nous eust encor mieux traité, comme nous eust-il peu garantir de tout le reste de la France, qui nous courroit sus comme traistres à l'Vnion immemorale iuree à cet estat Royal. Son nom est trop foyble & pauvre, pour nous conseruer des afflictions & miseres d'une guerre: il le faudroit conseruer luy-mesmes. Il n'est rien que de noz moyens qui ne sont bastans, ie ne diray pas d'entretenir simplement son Estat, celui de son frere, & de ses enfans, s'il



s'il en auoit, ce qui nous seroit bien cruel, & estrange mais de le garentir du premier effort d'un Roy de France, qui ne souffriroit iamais ceste vsurpation au preiudice des droits de sa Couronne : Couronne dictée la terreur des autres nations, qui ne fut iamais diuisee, mesmes entre les enfans du sang Royal, les heritiers qu'aussi tost elle ne soit reuenue toute vne sur le chef d'un seul Genereux Macedonien, qui larmoyant de ioye tressaillit d'aise, de voir Alexandre vostre Prince naturel assis en la chaire Royale de Darius, & qui n'auoit autre desplaisir, que de ce que voz peres n'auroient peu iouir, & participer à ce contentement : mais plus heureux & dignes de vos peres, si par voz diuisions vous n'eussiez fauorisé le desmembrement & le partage iniuste, entre les satrapes, Lieutenans & Gouverneurs des Prouinces de vostre monarchie, ruinees par voz ambitions, & seditions particulieres. Nous ne sommes rien moins braues que vous : mais beaucoup plus sages, heureux & plus aduisez que vous, qui ne permettons pas seulement d'estre si infames & rauilis de courage, que de voir ce Darius en la chaire Royale des heritiers legitimes de ceste Couronne. Cest estrangeur au trosne souuerain de ceste prouin-

ce, ce Charles de Sauoye faire de son Altesse dans nostre prouince, & corps de ville. Il est trop peu de chose, & nous sommes trop fideles à nostre Couronne: il y va trop du nostre. Pour son absence nous n'auons pas delaisé d'estre bons Catholiques, nous l'estions deuant luy, & le serons encores apres sa vie. Nous n'auons pas secours l'obeyssance du feu Roy, pour seruir à moindre que luy, & estre le iouët de celuy, qui au lieu de nous regir en bon Gouverneur, nous plôge, & nous remet en vne mer de troubles & miseres. Ratachons nous de plus fort avec Monseigneur le Duc de Mayene Lieutenant general de cest Estat Royal, & le Protecteur de nostre religion Catholique, qui a tousiours eu en l'ame ceste sainte semence de loyauté à l'endroit de ceste Couronne, pour quelques orages qui soyent suruenuz: la racine neantmoins de ceste belle plante de fidelité luy est tousiours demeuree au cœur trefvine nourrice & mere de ses belles fleurs & fruiets de fidelité, qu'elle a tousiours produit comme bon & naturel Francois à l'endroit des heritiers legitimes de ceste Couronne. Il nous garantira comme tref-puissant, de la crainte de ces vsurpateurs qui abusent si hardiment du pretexte de conseruer nostre religion  
pour



pour bastir sur noz testes des Citadelles & for-  
teresses, instruments & le maintien seigneurial  
& tyrannique, qu'ils en ont choisi pour maxi-  
me d'Estat de l'vsurpation de noz libertez,  
vies,& fortunes.



Handwritten text in a cursive script, likely a list or inventory, spanning the top of the page.

